



# Pelbagai inovasi dilakukan untuk penuhi stok bekalan darah - Pusat Darah Negara

Oleh [Mahani Ishak](#) - Januari 23, 2021 @ 3:57pm  
[mahani@bh.com.my](mailto:mahani@bh.com.my)

KUALA LUMPUR: Pusat Darah Negara (PDN) melakukan pelbagai inovasi baharu bagi memenuhi stok bekalan darah dan memudahkan orang ramai menderma darah sepanjang pandemik COVID-19, terutama dalam tempoh pelaksanaan Perintah Kawalan Pergerakan (PKP).

Pakar Perubatan Transfusi dan Ketua Seksyen Bahagian Perolehan Darah PDN, Dr D Thane Moze, berkata cabaran yang dihadapi pihaknya ketika pandemik COVID-19 adalah memastikan penderma dapat tampil melakukan pendermaan darah dengan lancar.

"Justeru kita mengambil beberapa langkah antaranya menyediakan slip pendermaan darah yang boleh diisi secara dalam talian dan dicetak atau boleh saja disimpan dalam telefon pintar.

"Jika seseorang penderma itu melalui sekatan jalan raya, dia boleh menunjukkan slip itu kepada polis bertugas kerana aktiviti pendermaan darah sudah mendapat kelulusan Majlis Keselamatan Negara (MKN) untuk beroperasi, termasuk menjalankan aktiviti bergerak dan pendermaan darah.

"Selain itu, bagi penderma terutama di Lembah Klang dan Putrajaya yang tidak dapat bergerak atau kekangan pengangkutan kami lakukan perkhidmatan 'pick up,'" katanya pada Program Amal Derma Darah Bersama Azhan Rani anjuran PDN dan Summit Attack Resources di PDN, di sini, hari ini.

Katanya, pihaknya memberi jaminan semua aktiviti pendermaan darah adalah selamat walaupun dalam tempoh pandemik selagi mematuhi prosedur operasi standard (SOP) ditetapkan PDN dan Kementerian Kesihatan (KKM).

"Kami mematuhi SOP ketat dengan setiap penderma perlu menjalani saringan suhu badan dan mengisi borang deklarasi COVID-19 sebelum dibenarkan ke proses menderma darah.

"Bagi yang mempunyai keraguan untuk datang ke PDN, kami menyediakan inisiatif untuk memudahkan penderma dengan menderma di pusat statik atau pusat bergerak mengikut SOP yang ditetapkan," katanya.



Program Menderma Darah Bersama Azhan Rani anjuran Summit Attack Resources dan Pusat Darah Negara di Pusat Darah Negara. - Foto NSTP/Eizairi Shamsudin